

Dada en Soria, primero dia de março, era de mill CCCLXVII annos. Yo, Pedro Ferrandez, la fiz escreuir por mandado del rey.

CXXIII

1329-III-2, Soria. Carta abierta de merced de Alfonso XI restituyendo el honor a Bartolomé Zanón y condonándole la deuda de 14.000 maravedis. (A.M.M. C.R. 1314-1344, f. 44 r; Pub. Giménez Soler: *Don Juan Manuel*, p. 576).

Sepan quantos esta carta vieren commo yo don Alfonso, por la graçia de Dios, rey de Castiella, de Toledo, de Leon, de Gallizia, de Seuilla, de Cordoua, de Murçia, de Jahen, del Algarbe e sennor de Vizcaya et de Molina. Porque el conçejo de la çibdat de Murçia me enbiaron dezir que don Johan, fijo del infante don Manuel, sin razon et sin derecho que mando tomar et cortar la lengua a Bartolome Çanoo et que le mando tomar quanto auia et que lo leuo preso a Chinchilla et que lo remedio por quatorze mill marauedis et que le dio por fiador a Sancho Sanchez de Hirriega, et esto que ge lo fizo porque dixo que ante que el moriese viesse al rey en Murçia porque le sacase del catiuero en que estaua. Et que me pedian que le feziese merçed et le diese por quito de la infamia et que non valiese menos por esto su fama et su onrra et que diese por quitos a el et a su fiador et a sus bienes de los dichos quatorze mill maravedis.

Et yo, por le fazer bien et merçed et porque me lo enbiaron pedir por merçed el dicho conçejo de Murçia et veyendo que me demandauan en ello derecho et razon, tengo por bien et mando que el dicho Bartolome Çanoo sea et finque quito para sienpre sin infamia ninguna et en su onrra, bien asi commo era ante que esto sin razon et sin derecho le fue fecho; et do por quitos al dicho Bartolome et a su fiador y a sus bienes de los dichos quatorze mill maravedis para en todo tiempo, et mando que por estos dichos maravedis non le sea fecha question nin demanda ninguna agora nin en ningun tiempo, et yo les do ende por libres et por quitos para sienpre jamas desta demanda. Et mando al adelantado et a los alcalles de Murçia, que agora son et seran daqui adelante, que les guarden todo esto que sobredicho es et que non consientan a ninguno que les faga demanda nin los traya a pleito sobresta razon destos dichos quatorze mill maravedis en ninguna manera, synon a los cuerpos et a quanto ouiesse me tornaria por ello.

Et desto le mande dar esta mi carta, seellada con mio seello.

Dada en Soria dos dias de março era de mill et CCCLXVII annos. Yo, Pedro Ferrandez, la fiz escreuir por mandado por del rey. Ruy Martinez. Johan Alfonso, vista.

